

Abril 2018.



Severiano Hernández, Salustiano Mato, José Alberto Díez de Castro e Gloria Pena.

57 REPRESENTANTES DE 40 UNIVERSIDADES ESPAÑOLAS DEBATEN EN VIGO OS RETOS DE FUTURO DAS SECRETARÍAS XERAIS

Duvi | Vigo

As XXIII Jornadas de Secretarías Generales-CRUE Universidades Españolas reúnen estes días no campus de Vigo representantes de 40 institucións académicas superiores do Estado. En total 57 persoas, na súa maioría persoal das secretarías xerais, participan nunha xuntanza na que se debaten temas como a administración electrónica ou a aplicación da lexislación de contratación pública. No acto de apertura da xornadas, Salustiano Mato, reitor da Universidade de Vigo e presidente de CRUE-Secretarías Generales, remarcou a importancia dos temas que se van tratar nunha xuntanza que arrancou onte mércores [+info](#).



Foto de grupo do alumnado do obradoiro.

O ALUMNADO DO PROGRAMA DE MAIORES DÉIXASE SEDUCIR POLOS MISTERIOS DO ANTIGO EXIPTO

Duvi | Vigo

A cultura do val do Nilo, chea de misterios, sempre chamou a atención de todos os públicos e semella que o fai especialmente do alumnado do Programa de Maiores da Universidade de Vigo que, un curso máis, copou as prazas do obradoiro de Extensión Universitaria Introdución á Cultura Exipcia II: Cultura, Arte e Literatura que se imparte na Escola de Estudos Empresariais e que vai xa pola súa terceira edición en Vigo.

As clases arrancaron en febreiro e a estas alturas do curso as algo máis de vinte persoas que asisten ao obradoiro xa tiveron a oportunidade de retrotraerse no tempo e coñecer máis de preto algúns dos segredos mellor gardados desta cultura, aprendendo incluso a interpretar os xeroglíficos inscritos nas pirámides que custodiaban os sepulcros dos faraóns. [+info](#).



A actividade celebra a súa oitava edición do 9 ao 13 de abril.

CIENCIAS EMPRESARIAIS E TURISMO CELEBRA A SÚA SEMANA MÁIS INTERNACIONAL

Rosa Tedín | Ourense

A Facultade de Ciencias Empresariais e Turismo do campus de Ourense celebra desde este luns e ata o venres 13 de abril a súa xa tradicional International Week, que permite ás e aos seus estudantes compartir actividades académicas e lúdicas con alumnado e profesorado estranxeiro. A cita máis internacional deste centro cumpre este curso a súa oitava edición acadando a participación de 110 estudantes propios, 12 da Universidade de Bremerhaven, en Alemaña, e 15 docentes de diferentes países da Unión Europea. [+Info](#)



A iniciativa foi presentada este luns no Concello de Ourense..

INVESTIGADORAS DO CAMPUS ÚNENSE A BOMBEIROS E APICULTORES PARA INFORMAR NAS ASOCIACIÓNS VECIÑAIS SOBRE A AVESPA VELUTINA

Rosa Tedín | Ourense

A avespa velutina está a piques de deixar de invernar e van a comezar a aparecer os chamados niños primarios que, situados a nivel baixo, serán o primeiro paso para a súa expansión. De cada unha das primeiras raíñas que agora esperten saíran arredor de 20.000 obreiras e unha decena de raíñas para crear os chamados niños secundarios. Este luns presentouse no Concello de Ourense unha campaña que baixo o lema Stop Velutina intentará, coa participación de investigadoras do campus, contribuír a frear a expansión desta especie invasora informando sobre ela nas asociacións veciñais da cidade. [+Info](#)



Unha das conferencias celebradas este luns na EE Forestal.

A SEMANA FORESTAL CONCENTRA MÁIS DE 20 CONFERENCIAS SOBRE TEMÁTICAS PROPOSTAS POLO ALUMNADO

duardo Muñiz | Pontevedra

A Escola de Enxeñaría Forestal celebrará este xoves o día do seu patrón, San Leandro, unha xornada na que os relatorios se combinarán coas actuacións musicais e que servirá como colofón á Semana Forestal 2018, o ciclo de conferencias promovido pola delegación da alumnado do centro, co apoio da escola e da Vicerreitoría do campus, que botou a andar na mañá deste luns. Un total de 23 conferencias integran o programa dunha iniciativa na que, explican desde a organización, foi o propio alumnado o que propuxo unha serie de temáticas a abordar co propósito de que os diferentes coloquios servisen como complemento á súa formación. [+Info](#)



Os investigadores da Universidade de Vigo Elena Ojea e Xavier Labandeira..

ELENA OJEA E XAVIER LABANDEIRA CONVERTEN VIGO NA ÚNICA UNIVERSIDADE ESPAÑOLA CON DOUS PARTICIPANTES NO 6º INFORME DO IPCC

M^a del Carmen Echevarría | Vigo

A Universidade de Vigo será a única institución española con dous investigadores dun total de 14, oito homes e seis mulleres, que participarán na elaboración do Sexto Informe do Panel Intergubernamental da ONU sobre cambio climático (IPCC). Á confirmación o pasado mes de febreiro do catedrático Xavier Labandeira, que repite desta volta como revisor editor, sumábase nas últimas horas a da investigadora Elena Ojea, que lidera na Universidade de Vigo o proxecto *Climate Adaptation to shifting stocks*, Clock, a través do programa *Starting Grant* do Consello Europeo de Investigación. [+Info](#)

3



A FEIRA INTERNACIONAL VIRTUAL DE EMPREGO FINDE.U SUPERA ESTE ANO OS 120 EXPOSITORES

D. Besadío | Vigo

Xa se inscribiron 1200 demandantes de emprego e a previsión é acadar os 3500 da anterior edición. Do 16 ao 18 de abril celébrase a terceira edición da Feira Internacional Virtual de Emprego Finde.U, unha cita pola que xa pasaron máis de 11000 visitantes e 450 empresas e na que este ano participarán máis de 120 expositores, 30 máis ca en 2017: 90 empresas con necesidades de contratación de persoal, 17 servizos/puntos de información relacionados con emprego e mobilidade e 12 xestionadas a través dos diferentes países participantes no ámbito da rede Eures. Organizan as universidades de Vigo, Porto, UTAD (Trás-os-Montes e Alto Douro) e a Universidade Católica Portuguesa – Oporto, [+Info](#).



María Fernández, a única representante galega na iniciativa Somos Científicos.

A INVESTIGADORA DE REXENMAR MARÍA FERNÁNDEZ REPRESENTARÁ Á UNIVERSIDADE NA INICIATIVA DE DIVULGACIÓN 'SOMOS CIENTÍFICOS'

M. Del Río | Vigo

Como serán os peixes que comeremos no futuro? A esta pregunta tratará de responder a investigadora de ReXenMar (Marine Genetic Resources lab) María Fernández na iniciativa Somos Científicos. Sácanos de aquí. Ela será a única representante galega nun programa de divulgación científica organizado por Fecyt e La Caixa entre o 16 e o 27 de abril no que 85 centros de ensino de España e Suramérica porán a proba a 30 científicos e expertos en diferentes áreas. Divididos en zonas temáticas, estudantes de entre 10 e 18 anos interactúan con científicos e científicas a través de internet, desafiándoos a través de chats, preguntando todo o que se lles ocorra e votando para elixir a científica ou científico favorito, que ganará 500€ destinados a divulgar o seu traballo. [+Info](#).



Arufe, Riveiro e García Soidán..

PROFESIONAIS DE OITO PAÍSES AFONDRARÁN EN PONTEVEDRA NAS ÚLTIMAS TENDENCIAS EN DEPORTE E SAÚDE

Eduardo Muñiz | Pontevedra

Co prazo de inscrición aberto ata o 29 de abril, o 14 Congreso Internacional de Ciencias do Deporte e a Saúde ten ata a data confirmada a participación de preto de 250 profesionais e investigadores, procedentes tanto dos diferentes puntos do Estado como de Colombia, Alxeria, Costa Rica, México e Portugal, aos que se suman ademais relatores e relatoras procedentes de diferentes universidades españolas e tamén de Cuba e Brasil. Todos eles reuniranse entre o 3 o 5 de maio no Pazo da Cultura para participar nunha nova edición dun evento, no que se presentarán máis dun cento de investigacións, dirixido a afondar “nas innovacións, no eido da actividade científica, relacionadas co deporte e a saúde”, así como nos “coñecementos aplicados e novas tendencias” nestes eidos, segundo salienta o profesor da Facultade de Ciencias da Educación e do Deporte José Luis García Soidán. [+Info](#)



O campus acolleu este xoves os II Encontros de Educación dende o Compromiso co Territorio.

O OBXECTIVO, CRER E CREAR UN FUTURO MELLOR PARA O RURAL

Rosa Tedín | Ourense

A Facultade de Ciencias da Educación do campus de Ourense acolleu este xoves os *II Encontros de Educación dende o Compromiso co Territorio. Achegamento ás Experiencias de Desenvolvemento Rural*, organizados por este centro xunto ao CIFP Portovello de Ourense. A cita reuniu a arredor de 400 inscristos e inscristas dos dous centros para estreitar lazos, para intercambiar perspectivas e sobre todo para que coñeceran a realidade e experiencias de éxito de desenvolvemento educativo no rural. [+Info](#)



PRETO DE 20 ACTIVIDADES PARA PÓR EN VALOR A CREATIVIDADE E A INNOVACIÓN

Duvi | Pontevedra

Conferencias, obradoiros, música e cinema, exposicións e sesións de traballo dirixidas ao persoal docente e investigador, a Semana Internacional da Creatividade e da Innovación, que se desenvolverá no campus a partires do vindeiro luns, reúne no seu programa preto de 20 actividades que teñen como nexo a posta en valor dos dous piares do proxecto de especialización Campus Crea S2i, a creatividade e a innovación social e sustentable. Promovida pola Vicerreitoría do campus coa colaboración das diferentes facultades e escolas, esta semana, sinalan desde a organización, busca tanto pór en valor a multiplicidade de titulacións e ámbitos de estudo que se reúne no campus como a transversalidade e multidisciplinariade que implica o proxecto de especialización. [+Info](#)



Salustiano Mato e Jesús Vázquez asinaron este xoves o acordo do seu financiamento. Na imaxe con Belén Iglesias e Fina Calleja.

UNIVERSIDADE E CONCELLO DE OURENSE POÑEN EN MARCHA O CONVENIO PARA O DESENVOLVEMENTO DA MITEU

Duvi | Ourense

Do 12 ao 28 de abril, os escenarios da cidade de Ourense volverán levantar o seu pano para acoller unha nova edición, a 23, da Miteu, a Mostra Internacional de Teatro Universitario de Ourense. Este xoves, Salustiano Mato, reitor da Universidade de Vigo, e Jesús Vázquez, alcalde de Ourense, asinaron o convenio de colaboración entre as dúas institucións para o desenvolvemento desta cita, que contará coa participación de 28 grupos, 15 deles aulas universitarias e os restantes de carácter profesional, procedentes de sete países. [+Info.](#)



Debido ás condicións climáticas a obra arrancou nos Xadíns Padre Feijóo pero continuou no interior do Liceo.

A AULA ROSAURA ARRANCA “SEN PÉS NIN CABEZA” UNHA NOVA EDICIÓN DA MITEU

Duvi | Ourense

“A nosa sombra acompañanos, sabe de nós e móvese en sixilo, en perfecta sincronía. No espello: brazos e cabeza, pernas e tronco reflicten seres incompletos froito da desconexión coa contorna, cos outros, co futuro incerto. Quizais sexamos manequíns en perfecta desorde. Onde está o meu pé, onde a miña cabeza?”. Con este argumento e baixo o título *Sen pés nin cabeza*, a Aula Universitaria de Ourense Rosaura arrancou este xoves a programación dunha nova edición, a 23, da Miteu, a Mostra Internacional de Teatro Universitario de Ourense. [+Info.](#)



Un intre da apertura do congreso..

INDUSTRIA, UNIVERSIDADE E ADMINISTRACIÓN DEBATEN EN VIGO SOBRE O FUTURO AERONÁUTICO E ESPACIAL DE GALICIA

Duvi | Vigo

Industria, universidade e administración debateron esta mañá en Vigo sobre o futuro aeronáutico e espacial de Galicia e fixérono no segundo congreso anual dun sector que durante os últimos anos moveu en Galicia arredor de 100 millóns de euros en investimentos e cuxas expectativas de crecemento para os vindeiros anos son moi positivas. A apertura da xornada estivo presidida por Enrique Mallón, presidente do Consorcio Aeronáutico Galego, e nela participaron tamén o reitor da Universidade de Vigo e presidente de Cinae (Centro Galego de Innovación Aeroespacial), Salustiano Mato; o alcalde de Vigo, Abel Caballero; a presidenta da Deputación de Pontevedra, Carmela Silva; a directora da Axencia Galega de Innovación, Patricia Argerey e a directora de Promoción Económica do Consorcio da Zona Franca de Vigo, Rosa Eguizabal. [+Info](#)



Este venres clausurouse unha nova edición do curso de Afaor centrado nesta temática.

20 NOVOS ESTUDANTES FORMADOS PARA FACER INTERVENCIÓN SOCIOEDUCATIVA CON PACIENTES DE ALZHEIMER

Rosa Tedín | Ourense

Este venres pechouse unha nova edición, a sexta, do Curso de Intervención Socioeducativa con Persoas Afectadas de Alzheimer, unha iniciativa da Asociación de Alzheimer de Ourense (Afaor) realizada co apoio da Fundación Dorzán, a Vicerreitoría do campus e a Facultade de Ciencias da Educación. Unha vintena de estudantes deste centro remataron un curso de formación especializada nun eido que, nunha das provincias, como é Ourense, e das comunidades autónomas, como é Galicia, máis envellecidas de Europa, demanda cada vez máis profesionais capacitados. [+Info](#)

6



Desde o seu inicio no curso 2012-2013 o programa superou os 200 estudantes.

O PROGRAMA DE DOUTORAMENTO DE CAMPUS DO MAR REFÓRZASE COA INCORPORACIÓN DA UNIVERSIDADE DE PORTO

M^a del Carmen Echevarría | Vigo

Seis anos tiveron que pasar para que a incorporación da Universidade de Porto ao programa de doutoramento de Campus do Mar se fixese realidade. DOMAR, o programa de doutoramento in Marine Science, Technology and Management, arrancou en 2012 e, aínda que ao longo destes anos as universidades e centros de investigación que o impulsan mantiveron unha estreita colaboración coa institución académica pública máis grande de Portugal, non foi ata hai uns días que a Axencia para a Calidade do Sistema Universitario Galego, Acsug, verificaba a entrada de Porto no programa de doutoramento de Campus do Mar. [+Info](#)



A Casa das Campás acolle desde este luns a exposición "Acheegas das mulleres á sustentabilidade do mar".

IGUALDADE E SUSTENTABILIDADE PARA DAR INICIO Á SEMANA INTERNACIONAL DA CREATIVIDADE E DA INNOVACIÓN

Eduardo Muñiz | Pontevedra

O campus de Pontevedra inicia este luns un amplo programa de actividades articulado en torno aos dous piares do seu proxecto de especialización, Crea S2I, a creatividade e a innovación social e sustentable, fío de unión das preto de vinte propostas que integran o programa impulsado pola Vicerreitoría do campus coa colaboración das diferentes facultades e escolas. A Semana Internacional da Creatividade e da Innovación deu comezo na mañá deste luns coa apertura da exposición *Acheegas das mulleres á sustentabilidade do mar*, primeiro acto dun programa que aglutina conferencias, actividades culturais, obradoiros e sesións de traballo dirixidas ao persoal docente e investigador. [+Info](#)

INTERNATIONAL Week 2018

Facultade de Ciencias Sociais e da Comunicación, Aula 5



CCSS E DA COMUNICACIÓN DÓTASE DUNHA SEMANA INTERNACIONAL

Eduardo Muñiz | Pontevedra

O pasado venres, a Facultade de Ciencias Empresariais e Turismo do campus de Ourense celebraba a clausura da súa xa tradicional International Week, unha semana que permite ao seu alumnado compartir actividades académicas e culturais con estudantes e profesorado estranxeiro. Con este evento como exemplo e como unha das medidas inseridas no plan de internacionalización do grao en Dirección e Xestión Pública, aprobado o pasado mes de xuño, a Facultade de Ciencias Sociais e da Comunicación impulsa neste mes de abril a súa propia International Week, que entre o martes 24 e o xoves 26 aglutinará os relatorios de investigadores da Gaziosmanpasa Üniversitesi e da Gazi University turcas e da polaca University of Wrocław. [+Info](#)

7

O II CONGRESO EUROAMERICANO DE DEREITO E POLÍTICA ARRANCA CON MÁIS DUN CENTENAR DE COMUNICACIÓNS PRESENTADAS

Rosa Tedín | Ourense

Desde este martes e ata o xoves, o campus de Ourense acolle a celebración da segunda edición do Congreso Euroamericano de Dereito e Política, coorganizado pola Área de Ciencia Política e da Administración da Universidade de Vigo e o Programa de Pós-Graduação em Justiça Administrativa da Universidade Federal Fluminense de Río de Janeiro, en Brasil. A cita cumpre o seu segundo ano superando o centenar de comunicacións presentadas e a asistencia de arredor de 150 persoas, medio centenar procedentes da outra beira do Atlántico. Nesta ocasión, o evento centra o seu interese no desenvolvemento sostible, tendo en conta o proxecto de especialización do campus de Ourense como Campus da Auga. [+Info](#)



A cita celébrase desde este martes e ata o xoves no campus.

I JORNADA

Mujer y proceso

18 y 26 de abril
de 2018



Universidade de Vigo

ESPECIALISTAS DE ESPAÑA E ITALIA DEBATERÁN SOBRE A MULLER NO PROCESO XUDICIAL

Duvi | Vigo

Investigadoras e investigadores de España e Italia participan este mes na I Jornada Mujer y Proceso, unha iniciativa impulsada conxuntamente polas facultades de Ciencias Xurídicas e do Traballo de Vigo e de Dereito de Ourense. Deste xeito, as xornadas desenvolveranse en dúas sedes, arrancando este mércores 18 en Vigo e trasladándose o día 26 deste mes á cidade das Burgas. Detrás deste programa formativo están as profesoras Inés C. Iglesias e María José Bravo Bosch, que destacan que se trata dunha xornada que ten como obxectivo efectuar un estudo sobre as liñas definidoras e a ampla problemática que afecta a esta temática dende unha perspectiva xurídica e psicosocial. Trátase así de completar a formación científica e humanística do alumnado, en especial das titulacións relacionadas coas ciencias xurídicas. [+Info](#)



MÁIS DE 2500 PERSOAS BUSCAN EMPREGO NA EDICIÓN VIRTUAL DA FINDE.U

D. Besadío | Vigo

Máis de 2500 persoas inscritas que demandan emprego, fundamentalmente de Portugal e España, pero tamén do resto de países europeos. Esta semana celébrase a terceira edición da Feira Internacional Virtual de Emprego Finde.U e, a pouco máis de 24 horas desde que abriu as súas portas, as e os visitantes presentaron xa ás máis de 130 empresas participantes preto de 2.900 currículos, concertaron 156 entrevistas vía *Skype* e hai máis dun cento pendentes de confirmación de horario. Por diante queda o resto da xornada do martes e todo o mércores, xa que as inscricións manteranse abertas ao longo dos tres días que dura a feira. [+Info](#)



Universidade de Vigo

DOUS TALLERES E UN SEMINARIO INTERNACIONAL AFONDRARÁN NO CAMPUS NO LIBRO-OBXECTO INFANTIL

Duvi | Ourense

O día 23 de abril celébrase o Día do Libro e aproveitando esta conmemoración, a Facultade de Ciencias da Educación do campus de Ourense acollerá a vindeira semana a celebración de dous talleres e un Seminario Internacional Libro-Obxecto e Xénero que afondarán no libro infantil como artefacto. A necesidade de abordar esta temática xorde, segundo explican desde a organización, tendo en conta o desenvolvemento que está tendo o mercado deste tipo de obras nos últimos anos e como estas publicacións mudan a forma de lectura tradicional. [+Info](#).



Alex Ferradás achegouse ao campus para contarlle a súa historia persoal.

ALUMNADO DO PROGRAMA DE MAIORES COÑECE OS RETOS AOS QUE SE ENFRONTAN AS PERSOAS EN CADEIRAS DE RODAS

Duvi | Ourense

Por segundo ano consecutivo, Alex Ferradás, persoa dependente dunha cadeira de rodas dende o ano 2006 e un dos fundadores do proxecto Working Wheels, achegouse ao campus de Ourense para falar da súa historia persoal e dos retos da visibilización das persoas con diversidade funcional. Fíxoo nesta ocasión no marco das actividades do Programa Universitario de Maiores e nunha actividade organizada unha vez máis polo Gabinete Psicopedagóxico do campus. [+Info](#)



UN SIMPOSIO INTERNACIONAL DE ARQUEOLOXÍA MEDIEVAL AFONDATA NO PROXECTO DO CASTELO DE MALPASO

Duvi | Ourense

A principios do ano 2016, o Grupo de Estudos de Arqueoloxía, Antigüidade e Territorio Geat, da Universidade de Vigo, puxo en marcha o Proxecto Sancti Salvatoris co obxectivo de estudar e valorizar un xacemento altomedieval situado nas inmediacións da aldea de San Salvador dos Penedos, en Allariz, e coñecido como Castelo de Mouresíños ou Castelo do Malpaso. Tras dúas campañas de traballo nel, os días 4 e 5 de maio a Facultade de Historia do campus de Ourense acollerá un *Simposio Internacional de Arqueoloxía Medieval* que permitirá dar a coñecer este traballo e avanzar coas achegas de diferentes expertas e expertos. [+Info](#)



Unha publicación do profesor Manuel Ojea presenta esta iniciativa.

O PROGRAMA RELATEA FACILITA A ESTUDANTES CON AUTISMO A CREACIÓN DE CATEGORÍAS CONCEPTUAIS

Rosa Tedín | Ourense

“Facilitar o desenvolvemento perceptivo-cognitivo das persoas con trastornos do espectro autista (TEA) a través da aprendizaxe de novos conceptos, a formación de categorías conceptuais que os engloban e o desenvolvemento de relacións interconceptuais”. Con este obxectivo vén de presentarse o libro *Programa Relatea. Desarrollo de categorías conceptuales en estudiantes con trastornos del espectro autista*, de Manuel Ojea, psicólogo e profesor da Facultade de Ciencias da Educación do campus de Ourense. Nel desenvólvese un programa aplicado xa experimentalmente con éxito neste colectivo. [+Info](#).



Nun diálogo organizado anualmente co gallo da celebración do día da Terra.

A INVESTIGADORA LAURA MOVILLA FALA NAS NACIÓNS UNIDAS SOBRE DEREITOS HUMANOS E NATUREZA

Duvi | Ourense

A profesora e investigadora da Universidade de Vigo Laura Movilla vén de intervir como relatora convidada experta en dereito internacional da auga e medio ambiente no *Eighth Interactive Dialogue of the General Assembly on Harmony with Nature*, que celebra todos os anos desde 2009 as Nacións Unidas co gallo da conmemoración o 22 de abril do Día da Terra. A cita celebrouse na tarde deste luns, 23 de abril, no Comité Económico e Social das Nacións Unidas, na súa sede en Nova York. Durante a sesión, Laura Movilla falou sobre a interdependencia entre os dereitos humanos e os da natureza, abordando cuestións de xustiza social. [+Info](#)



Conferencias en inglés centran o programa desta iniciativa.

TURQUÍA E AS IDENTIDADES DIXITAIS ABREN A SEMANA INTERNACIONAL DE CIENCIAS SOCIAIS E DA COMUNICACIÓN

Eduardo Muñiz | Pontevedra

A evolución dos e das profesionais das relacións públicas en Turquía ao longo das últimas décadas e a “segregación socio-espacial” que poden xerar as tecnoloxías da información e da comunicación e as redes sociais foron os dous temas cos que, da man do investigador turco Murat Seyfi, da Gaziosmanpaşa Üniversitesi, a Facultade de Ciencias Sociais e da Comunicación deu inicio este martes á súa International Week. Inserida no plan de internacionalización do grao en Dirección e Xestión Pública, esta semana ten como obxectivo impulsar as relacións internacionais da facultade, así como reunir no seu programa unha serie de conferencias en inglés a cargo de docentes estranxeiros. [+Info.](#)

10



Mª Teresa Fernández de la Vega e Salustiano Mato tras a sinatura do acordo.

A UNIVERSIDADE ASINA UN CONVENIO COA FUNDACIÓN MULLERES POR ÁFRICA QUE TRAERÁ A VIGO A ESTUDANTES DE POSGRAO AFRICANAS

. Besadío | Vigo

A presidenta da Fundación Mulleres por África, FMxA, e exvicepresidenta do Goberno Mª Teresa Fernández de la Vega, e o reitor en funcións da Universidade de Vigo, Salustiano Mato, asinaron este martes dous convenios de colaboración que facilitarán a chegada a Vigo de estudantes africanas para realizar nesta institución académica os seus estudos de posgrao. É a primeira medida dun acordo xeral que ten por obxecto contribuír a mellorar o desenvolvemento de África e realizar esforzos conxuntos para o deseño e implementación de proxectos e programas destinados a potenciar o empoderamento das mulleres africanas a través de programas de formación, educación, comunicación, emprendemento, ciencia e investigación. [+Info.](#)



Ao longo do 2018 e 2019 organizarán diferentes actividades con este obxectivo.

A DELEGACIÓN DE ALUMNOS E ALUMNAS DE DEREITO E O GRUPO MEDEA IURIS RECADARÁN FONDOS PARA UN PROXECTO SOLIDARIO NA INDIA

Rosa Tedín | Ourense

A Delegación de Alumnos e Alumnas da Facultade de Dereito do campus de Ourense e o Grupo de Investigación Medea Iuris da Universidade de Vigo veñen de presentar este mércores a posta en marcha dunha colaboración coa Fundación Vicente Ferrer. Ao seu abeiro e ao longo de 2018 e 2019, o alumnado deste centro organizará diferentes actividades para recadar fondos para un ou varios proxectos de loita contra a desertización e para a dotación de servizos hídricos en comunidades locais da India. [+Info.](#)



O encontro celébrase este mércores na Facultade de Ciencias da Educación.

O SEMINARIO INTERNACIONAL LIBRO-OBXECTO E XÉNERO REÚNE A EXPERTAS PROCEDENTES DE NOVE UNIVERSIDADES

Rosa Tedín | Ourense

A Facultade de Ciencias da Educación do campus de Ourense acolle este mércores a celebración da terceira edición do Seminario Internacional Libro-Obxecto e Xénero. Dando continuidade ás citas celebradas anos atrás en Aveiro e Zaragoza, o encontro reúne a expertas de nove universidades galegas, lusas e brasileiras co obxectivo de afondar no libro infantil como artefacto e no auxe que está a vivir o seu mercado nos últimos anos. [+Info.](#)

UNIVERSIDADE DE VIGO

Unidade de Análisis e Programas.

Anexo a xerencia.

Planta Baixa.

36310 Vigo (Pontevedra)

986.818.689 986.818.640